

Aesue. Diese Trocisci seind fast gut auß zutreibē die grobē feuchte flegma vñ rote Coleram/ auch andere schleimige feuchte. Vnd jr eygenschafft ist/ das sie das Hirn/ die Nieren/ die Augen/ die Ohren/ die Brust/ vnd die Lūg reynigen/ auch die Mutter/ des halben denn Democritus recht gesagt hat/ das Agaricus sey ein Arzney des ganzen Hauß gesindts.

Trocisci Allahandel.

Diese Trociscen werden selteinn allein gebraucht/ aber vnder ander Arzneyen gemischt/ reynigenn sie den Magen von vbriger feuchten flegma.

Trocisci de Lacca.

Diese Trocisci eröffnen die alten verstopffung der Leber vnd des Milz/ seind auch fast hilfflich den gelüchtigen vnd wassersüchtigen.

Cap. vi. Von Salben.

Ungentum Aureum.

Aesue beschreibet diese Salb/ vnd heist die gülden Salb/ denn sie heylet alle Wunden vñnd schleg/ nimpt auch hin alle mackelen so nach dem selbigen bleiben.

Ungentum Album.

Galenus. Diese weiß salb ist gut zu starckē Hauptweh/ welchs von groser hitz ist.

Ungentum Populeon.

Nicolaus beschreibet diese Salb ist gut in scharffen hitzigen febern. Sie macht die krankenn rühwig schlaffen/ leschet auch hitz der Leber vñnd Nieren/

sie ist nützlich zu hitzigem geschwerem vnd Wunden.

Ungentum Marciaton.

Nicolaus sagt das diese salb iren namen hab von einem bewerten Arz / Martianus genant / vñ ist gut zu allen schmerzen von kelt. Sie ist auch gut den lamen Gliedern von dem schlag / vñ dem Podagra / sie setz geschwulst / ist auch gut den wasserfüchtigen.

Ungentum Aragon.

Nicolaus. Diese Salb ist auch nützlich zu allen gebresten der kelt / in gleicher maß als von der nechsten gesagt ist.

Ungentum Agrippe.

Nicolaus sagt / das Herodes Agrippa der Jüden König diese Salb genützet hab. Sie wermet die kalten Glieder / vnd so manden Bauch mit salbet / machet sie stülgen vnd harnen.

Ungentum Dialthea.

Nicolaus. Diese Salb wermet die Glider / senfftiget den schmerzen der selbigen / sie weyhet auch vnd lindert alle harte geschwer / setz geschwulst / vnd ist sehr breuchlich zu schaden vnd Wunden.

Ungentum Citrinum.

Nicolaus. Diese Salb macht das Angesicht reyn / nimpt hinweg alle masen am Leib / vnd ist gut zu dē sehren roten Augen.

Ungentum Apostolorum.

Nicolaus. Diese Salb bessert alle Fistulen / reyniget die Wunden von vnreynem bösem Faulen Fleisch.